



7. marts 2022

UPA2022/93

Inatsisartut Suleriaasianni § 36 innersuussutigalugu apeqquteqaat allaavigalugu Inatsisartuni oqallisissiamik siunnersuut imaattoq saqqummiuppara:

**Meeqqat pillugit suliat kommunini naammaginartumik suliarineqartarnissaat qanoq qulakkeerneqarsinnaanera pillugu apeqquteqaat aallaavigalugu oqallisissiaq**  
(Inatsisartunut ilaasortaq Kim Kielsen, Siumut)

**Tunngavilersuut:**

Meerartavut paarilluagassaraavut. Angajoqqaajugutta, ittukkut ningiukkut akkakkit atsakkitt angakkitt ajakkitt, ilaqutaagutta minnerunngitsumillu inuiaqatigiittut meerartagut paarisassaraagut. Kalaallit uagut ileqqoraarput susassareqatigiinnermik ileqqoqarnerput. Taamaattumik tamatta pisussaaffeqarpugut meerartatta ajortumik pineqarnerini uagut akuliutissalluta, angajoqqaajugutta, ilaqutaaguttaluunniit aamma inuiaqatigiittut pisussaaffeqarpugut.

Ukiuni makkunani meeqqat illersuisuata aammalu inatsisartut ombudsmandiata oqariartuutigisarpaat, suliat ilaat suliassatut tiguneqareeraluarlutik skuffimmut iliinnarneqartarsimasut, tamatumalu kingunerisarlugu meeraq kannguttaatsuliorfigineqartut pisortanit ikiorneqarsinnaasarsimanatik.

Tamanna akuersaarneqarsinnaanngilluinnarpoq. Meeqqanik kannguttaatsuliorneq paasineqarneraniit ingerlatsiinnartumik meeraq ilagisaallu ikiorserneqarlutik aallartittussaapput. Taamaaliunngitsoortarnerilli unitsinniarlugit qanoq iliussaagut? Inatsisartut qanoq isumaqarpat? Ingerlatsinermi akimmittoqartannginnissaa qanoq aaqqiiviginiarneqarsinnaava?

Ullumikkut inuusaatitsinni siammasissumik inooriaaseqarpugut. Taamaattumillu aamma inuit inooqatigiit avinngarusimasumiittut aamma imminnut qanillilluinnarsimasarput. Ukiopassuarni politiitut sulininni sinerissatsinni tamanna malugisarnikuuara. Tamanna pitsaaquteqaraluaqaluni susassareqatigiinnermillu annertuumik takutitsiffiugaluarluni ajoraluartumik ilaanni ajortunik nalaatsiffiusarpoq. Soorlu eqqaariikkattuut meeqqanik kannguttaatsuliorortoqarsimaneranik pasitsaassinermi nalunaarutit allaffinni unittuuginnarsinnaasartut ilisimalereerivut.

Taamaattumik tamakku unitsinniarlugit inatsisartut tamarmik oqaloqatiginissaat pingaartippara. Oqallinnissamullu oqalliseqataanissannut qilanaarlunga.

Meerartavut illersortuartigit, angajoqqaatut, ittukkutut ningiukkutut, aanaakkutut aataakkutut. Akimmiffissallu piiarlugit pisortani sulisa.

Oqallilluarisi!